

1955 nienz 7 nyied, gou bizyez faenboiq bae siujyoz dang lauxsae. Ngamq ndaej buenq bi, youh dunghcih bae Gvangjsih Sawcuengh Hagdangz hag Sawcuengh. Doeklaeng youh faen bae Denzlinz Yen Sawuengh Hagdangz son saw. Gou ngamq 20 bi, Sawcuengh couh haidaeuz caeuq gou guhdoih lo.

Son gyoengq bouxcoz lajmbanj rox Sawcuengh liux, gyoengq hagseng gou couh dauqbae mbanjcoj banh ban, aeu Sawcuengh saujmangz. 1957 nienz, lajmbanj doihengz Sawcuengh guh ndaej hoenghhdwd.

Miz baez he, gou roengz lajmbanj bae genjcaz gij hong doihengz Sawcuengh. Roengz mbanj aeu byaij loh, mbouj miz ci naengh, lij gag aemq baufug dem. Gou bae Nazbij Yangh, aeu byaij 3 ngoenz, hwnj bo roengz nangh, ndonj ndoeng gvaq rij, con lajfaex gyang bo, caen dwg sinhoj. Daj gwnz haw Nazbij Yangh bae Mbanj-veihsanh, vanzlij caiq byaij buenq ngoenz roen lingq dem. Byaij ndaej gou gyaeuj in da va, hanh lae mbouj dingz, mbouj miz saekdi rengz, ga diem mbouj hwnj, couh ninz youq henz roen. Gvaq yaep he, miz song boux vunz gvaq loh, raen gou baenzneix, couh bang gou nap sa, rex gou bae ndaw mbanj. Daengz le doq heuh daengx mbanj vunz daeuj yawj, roxnaj gou dwg bouxlawz. Lauxsae son Sawcuengh Mbanjveihsanh raen dwg lauxsae de, couhoux gou bae ranz de youq, caiq cingj canghyw daeuj yw bingh, bwnq ywdoj. Daengz ngoenz daihngaih, gou cij ndei di.

Haemh he mbwn haeuj laep, bouxcoz saumbwk couh bae hagdangz hag Sawcuengh. Haemh haenx gou bae hwnjdangz, son hag sawcih, caezgya doq hag doq yungh, hag ndaej gig

·Gou Caeuq Sawcuengh·

Sawcuengh Buenx Gou 60 Bi

壮文伴我60年

□ Suh Dasingh / 苏大星

nauhyied. Bouxbox cungj haenh naeuz Sawcuengh ndei hag ndei yungh, hag rox gij sing caeuq baenz-lawz sij gyoep, couh rox sij cih geiq fwen, caiq mbouj dwg boux-vwnzmangz lo.

1960 nienz, Sawcuengh hainduj haeuj siujyoz, yen gyauyuzgiz diuh gou bae siujyoz lajmbanj dang lauxsae. Gou son aen ban he, daj it nienzgaep hwnj couh son Sawcuengh, gyoengq lwnyiez maij hag, song ndwen couh geiq ndaej singmeh, seiq ndwen rox maegsij yinhmeh, geiz daihngaih hag rox gyoep rox gangj, sij cih sij cozvwnz. Doeklaeng, aen ban hagseng neix bouxbox cingzeik cungj haemq ndei, caezgya angq hwnj cuhcungh.

Vwnzgwz seizhaenx, doihengz Sawcuengh couh ngaiz dingz, gou haeuj cuhcungh lajmbanj bae son saw. Yienznaeuz mbouj miz Sawcuengh son, hoeng gou yungh Sawcuengh cungj mbouj daengx seizlawz. Saekseiz aeu daeuj geiq saeh, roxnaeuz sij saenq hawj baengzyoux rox Sawcuengh, roxnaeuz sij faenzcieng geiq hawj 《Gvangjsih Minzczuz Bau》, ciengz yungh Sawcuengh bau mbouj lumz gij saw Bouxcuengh raeuz.

1980 nienz, swcigih dauqfuk

doihengz Sawcuengh, yen cujczibu diuh gou bae guh yen minzyijveij fucujyin, giem dang yen minzyijban cujyin, lij giem guh yaucangj yen yozyau Sawcuengh. Lai rapnaek youq mbaq, lai maqmuengh youq ndang, gou cijndei gwed hwnj baenaj. Comz gyoengq lauxsae caemhcaez guh, ciusou hagseng cingzeik ndei, yunghsim beizyangj hagseng. Doeklaeng gyoengqde mboujdan Sawcuengh hag ndaej ndei, Sawgun hix hag ndaej ndei.

Doihengz Sawcuengh bungz daengz haujlai hojnanz, lij ca di mbouj caiq guh gij hong neix dem. 1990 nienz, gou caeuq yenyinzda cujyin bae Namzningz camgya swcigih minzyijveij veiyei. Youq gwnz hoilh, dou daezok Denzlinz aeu doihengz Sawcuengh, itdingh guh gij hong neix ndei. Doeklaeng ndaej daengz minzyijveij baecinj. Daj seizneix hwnj, doihengz Sawcuengh youq Denzlinz miz diegnamh, miz gomiuz, laeglemx hai va, menhmenh ndaej giet baenz mak hung.

1986 daengz 1990 nienz, miz 8 boux cuhcungh, gauhcungh bizyez hagseng daeuj daengz ranz gou, cingj gou son gyoengqde Sawcuengh, ndei camgya bihaenx gya gauj Sawcuengh.

Gou dapwnqg gyoengqde, yungh yez-yiz seizgan nem singgeizroek, ngoenz-singgeiz daeuj hag, yivu son, mbouj aeu saek faen cienz, son rox cij daengx. Doeklaeng, 8 boux hagseng neix Sawcuengh cungj gauj ndaej faen sang, hwnj swcigih yozyau Sawcuengh. Bizyez le, dauq daengz ndaw yen, 5 boux ndaej anbaiz youq yienhsingz gunghcoz, 3 boux youq yozyau lajmbanj son Sawcuengh.

Sawcuengh buenx gou 60 bi daeuj, gou cungj yunghsim guh hong, 1985 nienz 9 nyied, swcigih yinzminz cwngfuj fat hawj gou bonj yungzyi cwnghsuh he, haenh gou “guh gij hong gyauyuz 25 bi”. 1992 nienz, Bwzswz Si minzyijban fat hawj bonj cwnghuh he, haenh gou “doihengz Sawcuengh guh’ok cingzeik hung”. 1998 nienz Gvangjsih Minzczuz Bause fat hawj bonj cwnghsuh he, gujli gou lai sij faenzcieng. 2010 nienz daej, gou bingz hwnj gij youhsiu dunghsinyenz Gvangjsih Minzczuz Bau.

Daj Sawcuengh buenx gou hainduj, gou miz 220 lai bien fwen, gojgaeq, sawcuenh, sanjvwnz daengj daengh youq 《Gvangjsih Minzczuz Bau》caeuq 《Sam Nyied Sam》, vih gij saw Bouxcuengh raeuz guh’ok saekdi rengz.

Geijcib Bi Maqmuengh, Ndaej Nduen Lumj Fangzhwnz

几十年希冀，如愿似梦中

□ Veiz Vwnzgauh / 韦文高

Mbouj rox dwg mbwn dingh
Naeuz dwg mingh gag baenz
Miz boux cam boux gaen
Gou baenq gyaeuj bi rwz

Neix mbouj dwg mbwn dingh
Mbouj dwg mingh gag baenz
Miz sawcih bonjfaenh
Simdaeuz gou haenq angq

Gou ndiepgyaez Sawcuengh
Vih siengjmuengh diegcoj
Ndaem ciengx rox gohyoz
Baet gungzhoj baenz fouq

Geijcib bi gvaqdaeuj
Gou mbouj dingz mbouj cuengq
Ciengz hag yungh Sawcuengh
Ndawsim vuenghfwdfwd

Saeh gonq seizneix muengh
Sawcuengh deng dingz dai
60 nienzdaih byai
Gou yaek dai ienuengj

Senj guh bouxbaujguenj
Geiq soq aeu Sawcuengh
Haeujok sij gwnz buengj

Beixnuengx cungj yawj rox

Fanhfanh ngeix mbouj daengz
Angq mboujcaengz geij ngoenz
Deng raemxronz daeuj doengq
Geij coenz vah buenqcoih

Naeuz gou yungh Sawcuengh
Nyuengx ginzcung mbouj dingq
Caeuq baihgwnz doxdingj
Dingh dwg bouxfanjdung

Vunz ranz gou lau dai
Bae baiq gyoengq bouxdaeuz
Ndaq gou mbouj dingq naeuz
Ngaemgyaeuj bae boizlaex

Vih ansim bouxlaux
Dauqma cang gaenq cuengq
Ndaw laep hag Sawcuengh
Mbouj rox bae fueng lawz

Couh daj mwhhaenx hwnj
Gou hwnzngoengz gwq muengh
Ngoenzlawz va Sawcuengh
Dauq cuengq rag did ngaz

Cib’it gai hoihhung



Dahsau baijyienj dinfwngz siuqva.

Cinz Veifungh ingj

Sam cung cienzhohih gvaq
Sawcuengh dauq did ngaz
Caen hai va dahraix

Daengx gih gak yienh si
Gizgiz hag Sawcuengh
Hozsanh mbouj nda’nduengq
Gou saetmuengh dangqmaz

85 nienz Bihaenx

Gou gaenq nyaenx mbouj ndaej
Vaiz maenh lij aeu cae
Ngaemgyaeuj bae haenqrengz

Gou dauqcawq dajdingq
Dwk denva bingj mingz
Caiq buet gwnz buet laj
Muengz ra hag Sawcuengh
(caengz sat)